

ՄԻՋԱԶԳԱՅԻՆ ԳԻՏԱԿԱՆ-ԵԿԵՂԵՑԱԿԱՆ ՀԱՄԱԺՈՂՈՎ ՄՈՍԿՎԱՅՈՒՄ

Սույն թվականի մայիսի 11—19 օրերին Մոսկվայում, Ռուս Պատրիարքության հրատարակչության շենքում, տեղի ունեցավ Ռուսիայի մկրտության 1000-ամյակին նվիրված միջազգային երկրորդ գիտական-եկեղեցական համաժողովը, որի թեման էր՝ **Ռուս Պրավոսլավ Եկեղեցու Աստվածաբանությունն ու ոգեկանությունը**:

Գիտաժողովին մասնակցում էին 28 երկրներից հրավիրված 151 եկեղեցական գործիչներ և գիտնականներ: Մասնակիցների թվում կային 79 սովետական և 72 արտասահմանյան երկրացուցիչներ. Կ. Պոլիս, Ալեքսանդրիա, ԱՄՆ, Ամստերդամ, Բեռլին, Լեհաստան, Բուլղարիա, Չեխոսլովակիա, Սերբիա, Կիպրոս, Հունաստան, Եթովպիա, Անգոլա, Ֆինլանդիա, Շվեդիա, Հոլանդական կաթոլիկ, Եկեղեցիների Համաշխարհային Խորհուրդ և այլն: Գիտաժողովին իրենց ներկայացուցիչներն էին ուղարկել նաև մի շարք Աստվածաբանական և աշխարհիկ գիտական-ուսումնական հաստատություններ՝ Աթենք, Թեսալոնիկե, Փարիզի Ս. Սերգիի անվան աստվածաբանական ինստիտուտ, Հռոմի պապական ինստիտուտ, Ռեգենսբուրգի (ԳՖՀ) արեվելյան ինստիտուտ, Բեռլինի, Հալլեի, Վիտենբերգի, Թյունինգենի համալսարաններ: ՍՍՀՄ-ից իրենց մասնակցությունն էին բերել Վրաց, Էստոնիայի և Լատվիայի Եկեղեցիները, Մոսկվայի և Լենինգրադի հոգևոր ակադեմիաները, Օդեսայի, Կաունասի և Մցխեթայի հոգևոր ճեմարանները, Մոսկվայի պետական համալսարանը, ՍՍՀՄ գիտությունների ակադեմիայի մի շարք ինստիտուտներ և մի քանի այլ քրիստոնեական հարանվանություններ և գիտական հաստատություններ:

Հայ Եկեղեցու կողմից, Վեհափառ Հայրապետի բարձր կարգադրությամբ, իր մասնակցությունը բերեց Ս. Էջմիածնի հոգևոր ճեմարանի դասախոս Ս. Պարզև վրդ. Մարտիրոսյանը:

Մայիսի 11-ին, ժամը 9.30-ին, տեղի ունեցավ համաժողովի բացումը: Բացման խոսքով հանդես եկավ համաժողովի նախագահ, Կիևի և Գալիցիայի միտրոպոլիտ Ֆիլարետը: Այնուհետև Միմսկի և Բելոռուսիայի միտրոպոլիտ Ֆիլարետը ընթերցեց Նորին Սրբություն Պիմեն Պատրիարքի ողջույնի խոսքը՝ ուղղված համաժողովի մասնակիցներին: Ողջույնի խոսք ասաց նաև Վոլոկոլաբայի միտրոպոլիտ Պիտիրիմը

(Ռուս Եկեղեցու հրատարակչության բաժնի նախագահ):

Համաժողովի ընթացքում ներկայացվեց շուրջ 94 զեկուցում: Ամեն մի զեկուցումից հետո տեղի էր ունենում մտքերի փոխանակություն և քննարկում: Զեկուցումները վերաբերում էին Ռուս Եկեղեցու Աստվածաբանական մտքի պատմական զարգացմանը, Ռուս ճգնաժամային շարժմանը և նրա նշանակությանը հարևան ժողովուրդների կյանքում, Ռուս Աստվածաբանության և ոգեկանության դերին ու ազդեցությանը՝ ընդհանուր ուսական մշակույթի և կենցաղի վրա, դրանց արտացոլումը ուսական մշակույթի հայտնի գործիչների ստեղծագործություններում և այլն: Զեկուցումներում ընդգծվեց նաև խաղաղարարական սկզբունքների դերը ուս Աստվածաբանության մեջ, ուս Աստվածաբանության հոգևոր ներդրումը համաշխարհային Եկեղեցիների ծրագրում, Ռուս Եկեղեցու միսիոներական դերը Եվրոպայում և այլն: Գիտաժողովն ընդգծեց քրիստոնեության ընդունման խորը և պայծառակերպող ազդեցությունը հին Ռուսաստանի հասարակական և մշակութային կյանքի բոլոր ոլորտների վրա:

Գիտաժողովի մասնակիցներն ընդգրկեցին ջերմ և անկեղծ մթնոլորտը և ընդհանուր ձգտումը դեպի Աստվածաբանական, գիտական ու պատմական ճշմարտությունների վերհանումը: Մայիսի 15-ին և 16-ին գիտաժողովի մասնակիցներն այցելեցին Անդրեյ Ռուբլովի թանգարան, Կրեմլ, Ս. Դանիելյան վանք և Ռուս Եկեղեցու արտաքին կապի բաժին:

Մայիսի 17-ին մասնակիցներն այցելեցին Զագորսկ, ուր Ս. Սերգեյի հիմնած Սուրբ Երրորդություն վանքում մասնակցեցին Ս. պատարագի:

Մայիսի 18-ին, գիտաժողովի ավարտին ընդունվեց հաղորդագրություն, ուր հույս հայտնվեց, որ ինչպես այս, այնպես էլ նրանց այլ գիտաժողովներ կնպաստեն Աստվածաբանական մտքի զարգացմանը, ոգեկանության նշանակության ընկալմանը ժամանակակից աշխարհում, Եկեղեցիների միջև եղբայրական հարաբերությունների ամրապնդմանը և բոլոր Եկեղեցիների համագործակցության հզորացմանը՝ ի նպաստ աշխարհի մշտադադար խաղաղության:

ՊԱՐԳԵՎ ՎՐԴ. ՄԱՐՏԻՐՈՍՅԱՆ